

**Nioqqutissanik eqqussuinermi akitsuutit pillugit Inatsisartut inatsisaata  
allanngortinneqarnera pillugu Inatsisartut inatsisaannut siunnersuut**  
(Aningaasaqarnermut Akileraartarnermullu Naalakkersuisoq)

**Saqqummiussissut**

**Siullermeerneqarnera**

Naalakkersuisut nioqqutissanik eqqussuinermi akitsuutit pillugit Inatsisartut inatsisaata allanngortinneqarnera pillugu Inatsisartut inatsisaannut siunnersuut matumuuna saqqummiuppaat.

Siunnersuut akileraarutinik akitsuutinillu aqqissuusseqqinnissami ” Nunarput najoruminarnerulersitsigu”, Naalakkersuisut, Siumut aamma IA-p isumaqatigiissutigisimasaanni, alloriarnerni siulliuvoq. 2024-mi ukiaanerani ataatsimiinnermi siunnersuutit allat arlallit, inunnut aningaasarsianit akileraarutinik ukiumut 360 mio. koruunit missaannik annikillisisussat, saqqummiunneqassapput. Naalakkersuisut tamatuma saniatigut, akileraarutinik aqqissuusseqqinnissaq pillugu partiit isumaqatigiissuteqartut isumaqatigiissuteqarnerisa malitsigisaanik, ukiuni aggersuni siunnersuutinik allanik saqqummiussisassapput. Peqatigisaanik tamanna isumaqarpoq, akileraarutinik akitsuutinillu allanngortitsinissamut siunnersuutit, aqqissuusseqqinnermi siunertanut imaluunniit piffissamut pilersaarutinut akerliusut, Naalakkersuisut ukiuni aggersuni tapersersortarnianngikkaat.

Sukkunut il.il. aamma eqqiluisaarnermut atortunut il.il. eqqussinermit akitsuutip atorunnaarsinneqarnissaa, kiisalu sodavandinut qummoroortartunullu eqqussinermit akitsuutip appartinneqarnissaa, siunnersuummi matumani pingaarnertut siunertaapput. Allanguutini pingaartumik nioqqutissanut, innuttaasuni amerlasuuni nalinginnaasumik atuinermi ilaatinneqartartunut, akinik appartitsinissaq siunertarineqarpoq.

Ukioq manna januaarimi sukkunut, glukosenut il.il. akitsuut atorunnaarsinneqarpoq, kisianni taamaallaat 2024-mut tunngatinneqarluni. Inatsisissatut siunnersuummi atorunnaarsitsineq taanna ataavartussanngortinneqarpoq. Atorunnaarsitsinermi akitsuutinit iluanaarutit ukiumut 12,3 mio. koruunit missaannik annikillisinneqassapput.

Tamatuma saniatigut eqqiluisaarnermut atortunut, tipigissaatinut, pinneraatitut assigisaannullu akitsuutip atorunnaarsinneqarnissaa siunnersuutigineqarpoq. Akitsuut 2024-mi 4 mio. koruunit missaannut missingersuusiorfiuvoq.

Sodavandinut il.il. akitsuut nunarput tamakkerlugu assigiimmik annertussuseqalissasoq siunnersuutigineqarpoq. Tamatuma kingunerisaanik akitsuut literimut 5,75 koruuninut appartinneqarpoq. Tamatuma malitsigisaanik Qaanaamut, Ittoqqortoormiinit imaluunniit

Tasiilamut maannakkut eqqussinermut immikkut ittumik akitsuusiisarneq pisariaaruppoq, tassami akitsuut siunissami Kalaallit Nunaannut sodavandinik il.il. eqqussinernut tamanut assigiilertussanngormat. Akitsuutip appartinneqarnera ukiumut 10 mio. koruunit missaannik iluanaarutini annikillisisissasoq nalilerneqarpoq.

Qummoroortartunut akitsuut fakturap akiata 50 procentianut appartinneqassasoq siunnersuutigineqarpoq. Allannngortitsineq iluanaarutini 1,5 mio. koruunini annikillisisissaaq.

Akitsuutini iluanaarutit ukiumut katillugit 28 mio. koruuningajannik annikillisinneqassasut siunnersuutigineqarpoq.

Tamatuma saniatigut imeruersaatinut eqeersaatilinnut akitsuutip kalaallisoortaata oqaatsitigut iluarsineqarnissaa siunnersuutigineqarpoq.

Naggataatigut siunnersuut tassungalu nassuiaatit innersuussutigissavakka.

Taamatut oqaaseqarlunga siunnersuut Inatsisartuni suliassanngortippara.